

觀覺靈繼 大明紫靈 九神度魂 開闢玉真
 阿奕煒燁 飛天流音 輪景帝常 都靈願臻
 豁落大有 慶雲靈靈 七耀輝魔 恬愉敷榮
 虛无上首 天紀彌宸 四吁首象 濯耀騰精
 煥赫洞湯 浮景玉堂 七靈誦歌 世元紫堂
 羅英散景 耀明玉房 八景總歌 韶悉攝精
 九都鸞鸞 飛生上靈 宿羅靜境 覆育空輪
 灌沃黃華 靈運玄明 神宜開廓 延究昇庭
 大猷浮景 真定化元 映空素眇 玉界澄煙
 蕭時結賜 景羅七纏 秀盤玉府 沅輝九玄
 寂然虛逸 飛華拂軒 晨溫綠籍 太漢由延
 阿丘九度 六龍僂疎 蒼靄浮羅 紫精覆淵
 溟滓太育 九機化乾 覆形厚德 元河淪精
 育英明陀 景農眇雲 大何總監 秀樂禁天
 紫虛陀立 劫量交前 碧霞撲梵 眇眇遊元
 六變運量 誠絕惡愆 恢冠玄漠 萬度成仙
 是時諸天大聖妙行真人三界十方无鞅真
 宰雲集
 元始座下聞聽法音開悟正性各各作禮信
 受奉行

元始天尊濟度血湖真經卷上

正一天師清微弟子 洪百堅 製作
 道教學術資訊網站

元始天尊濟度血湖真經卷中

爾時
 元始天尊懸坐空浮五色獅子之座玉童玉
 女萬億天真羅列侍衛而告妙行諸仙真人
 曰東北方壬癸之地有大荒溟渤海水腥穢
 无邊莫測中有大山上參碧落下入風泉名
 曰北陰鄴都羅山周迴萬里是陰氣之主九
 地樞機焉分列諸獄考罰世人罪惡及飛禽
 走獸胎卵濕化鱗甲羽毛動植飛潛咸皆隸
 焉中有一獄在北陰大海之底名曰血湖硤
 石大小鐵圍无間溟泠地獄又分四子獄曰
 血池血盆血山血海四獄相通有神主之號
 曰血湖大神在於无極水底水流其上臭氣
 衝天凡世間產死血屍女人皆是宿世母子
 仇讎冤家纏害乃至今生一一還報寂寂於
 冥夜之中號號於黑暗之下渾身血汗臭穢
 觸天金槌鐵杖亂考无數飢饉大渴飲血
 池萬死萬生不捨晝夜常居黑暗不覩光明
 雖遇符簡善功罪過小減不能出離難得出
 離化生異類子須有神力不能救拔此東方

長樂世界有大慈仁者太一救苦天尊昔在劫初發弘誓願化身如恒河沙數物隨聲應在天呼為太一福神在世呼為大慈仁者在獄呼為日耀帝君在外道攝邪呼為獅子明王在水府呼為洞淵帝君汝是吾之悉吾是汝之根汝知吾知此是九陽之精甚靈甚靈或居天宮或降人間或居地獄或攝群邪或為仙童玉女或為帝君聖人或為天尊道士或為真人老君或為天醫功曹神通无量功行無窮尋聲救苦應物隨機汝等可舉聲唱太一之名使仙官齊誦自然應化現身於是諸仙真人齊聲稱誦太一救苦天尊之名想見天尊乘五色祥雲九頭獅子放百寶瑞光淨空而至元始會下稽首作禮遵稟受戒於是

元始天尊曰吾觀慾界眾生女人造種種罪業身墮血湖受苦沉淪動經億劫永無出期吾今開環函寶藏出金錄赦文卿可齋往下方宣告三界十方三官九署十二河源九幽血湖地獄救拔罪魂得辭長夜覩見光明於

是太一救苦天尊大慈大悲普濟度時有慈悲救苦真人大慈大悲真人太一八十一神天丁力士青玄功曹黃籙童子玉女神王擁從法駕

天尊放百億瑞光左手擊琉璃寶瓶右手執空青羽枝乘九頭獅子金蓮翠葉之座乘空而去敕詔九鳳破穢大神洗浣大神元義斷恩大神正精火目大神震雷鼓目大神全形復體大神解冤釋對大神清蕩血湖破除陰厭穢告下元始符命元皇曲救度產死罪魂時刻昇遷是時酆都北帝及諸鬼官牛頭獄卒威斂神王三界大魔九億鬼王血湖大神咸遵勅命救拔罪魂九幽黑簿一時焚燼血湖清蕩化為寶池金槌鐵杖變成蓮華飲血食穢化為甘露一切罪魂頓悟本真乘光超度皆得生天地獄冥官皆發善念同乘惠力證道成真而獻頌曰

稽首虛無无上道 慈悲救苦大慈尊
神光百億照中昏 遍覆慈雲濡法雨
硤石溟泠無間獄 血湖血海血池盆

玉蕊大教諸罪魂 解脫沉淪萬劫苦
鍊形度命朱陵府 悟道登真衆妙門
巍巍功德難思議 未為衆生作慈父
是時慈悲救苦諸大真人依稟
聖旨宣通命今開明長夜救拔幽途凡沐慈恩同超極樂

元始天尊濟度血湖真經卷中